

Alver kommune

v/ kommunestyret

v/ fagansvarleg stab og oppvekst Leif Bjørnar Hopland

UTTALE VEDK. SAK 23/444 HØYRING-UTVIDING AV TAL TELJETIDSPUNKT BARNEHAGE

Teljetidspunkt.

Under handsaming av denne saka i kommunestyremøtet om økonomiplanen den 15.12.22., var eit av argumenta frå politikarane for utviding av teljetidspunkt at dei ønskte kontinuerlege opptak av barn i barnehagar gjennom heile kalenderåret. Leiketun barnehage (og dei andre private barnehagane i Alver) gjennomfører allereie dette. Utviding av teljetidspunkt vil såleis ikkje medverka til å auka opptaket i dei private barnehagane.

Tre teljetidspunkt istaden for eitt innebær sjølvstøtt eit meirarbeid for barnehagen.

Tre teljetidspunkt gjer barnehagedrifta usikker, då ein i løpet av kalenderåret kan få endringar i driftstilskotet tre gonger.

Ledige barnehageplassar.

I saksutgreiinga som politikarane la til grunn for debatten i kommunestyremøtet i desember, var Leiketun barnehage oppført med ca 50 ledige barnehageplassar. Det reelle talet på ledige plassar var på det tidspunktet berre 9, ut frå det tal på barnehageplassar som Leiketun barnehage har godkjenning for.

Administrasjonen si oversikt over ledige barnehageplassar i dei ulike barnehagane i Alver viser at det er i fleire av «utkantane» i kommunen dette talet er størst. Talet på barn som treng barnehageplass i åra framover, vil gå ned i Alver. I Statistisk Sentrabyrå si oversikt over befolkningsvekst/framskriving for 0-5 åringer i ulike deler av Alver kommune, ser ein at det er minst nedgang i sentrale deler i kommunen. I tillegg må ein rekna med størst tilflytting til dei sentrale områda i kommunen.

Verbalpunktet om utviding av teljepunkt, som vart vedteke på kommunestyremøtet den 15.12.22., verka som å vera motivert av at ein skulle spare pengar. Det ville i så fall i størst grad slå ut i barnehagane i «utkantane», då det er der det alt er prosentvis flest ledige barnehageplassar og minst auke i barnetalet. Er det dette politikarane i Alver vil oppnå? Om ein vil oppretthalda levande bygder og gjev barnehagebarn i alle deler av kommunen like vilkår, bør ein heller sørgja for at barnehagane har eit naudsynt driftsgrunnlag.

Økonomiske konsekvensar for drifta av barnehagen.

Tre teljepunkt og variabelt driftstilskot i løpet av kalenderåret, vil gjera det svært vanskeleg å planleggja drifta i barnehagen. Den økonomiske situasjonen i Leiketun dei siste åra, har vore slik at ein ikkje har hatt mykje handlingsrom. Det er såleis viktig å ha eit mest mogeleg stabil økonomisk driftsgrunnlag.

Personalutgifter er ein stor del av driftsutgiftene til barnehagen. I periodar mellom teljepunkta, kan dette føra til at ein ikkje kan ta inn barn om dette vil medføre ekstra personalutgift.

Konsekvensar for personalet.

Vi ønskjer at Leiketun barnehage skal vera ein god arbeidsplass for dei tilsette. Vi ønskjer å ha gode, kompetente arbeidstakarar i barnehagen. Det er til barna sitt beste at vi har stabilt personale.

For å handtera ulike tildelingar av driftstilskot gjennom kalenderåret, kan det medverka til at vi må permittera tilsette i periodar. Eit utviding av personalgruppa i periodar, vert i praksis vanskeleg.

Vi står i fare for å missa dyktige tilsette. Og vi ser det som vanskeleg å få dyktige og kompetente tilsette i korte periodar. Det er såleis fare for at dette fører til at vi misser trygge, stabile tilsette med god kompetanse og kjem til å få store vanskar med å erstatta dei.

Konsekvensar for barn med rett til barnehageplass.

Barn har rett på barnehageplass fram til 1.12. det året dei fyller 1 år. Dersom barn med slik rett søker barnehageplass mellom teljetidspunkta, kan det føra til at vi ikkje kan tilby slik plass, ettersom vi ikkje har økonomi til å tilsetja nødvendig ekstra personale.

Viser elles til at Bergen kommune i slike høve, gjev driftstilskot til desse barna utanom teljetidspunkta også.

Like behandling/tilbod av alle barnehaganebarn i Alver.

Dersom det skal innførast utvida teljetidspunkt i Alver, må dette få like konsekvensar for både dei kommunale og dei private barnehagane i Alver.

Viser til at tilskotet til dei private barnehagane er utrekna etter dei kommunale barnehagane sitt rekneskap 2 år tilbake i tid. Men i rekneskapet til dei kommunale barnehagane er ikkje stordriftsfordeler i kommunen teke med. Dei private har og må dekke desse utgiftene i tillegg i sine rekneskap (t.d. utgifter til rekneskap og revisjon, innkjøp m.m.).

Leiketun barnehage ønskjer ikkje at det vert innført tre teljetidspunkt i kvart kalenderår. Dette for at barnehagen skal ha eit oversiktleg og føreseieleg driftsgrunnlag. Det er også viktig for å ha eit godt, stabilt og kompetent personale, noko som er til barna sitt beste.

Frekhaug 31.3.2023.

Mvh

Leiketun barnehage v/ dagleg leiar Wenche Øpstebø